



60 pelajar SMK Ubai lawat kampus UMP

Seramai 60 pelajar tingkatan lima Sekolah Menengah Kebangsaan (SMK) Ubai, Pekan bersama empat guru pengiring berkunjung ke kampus Universiti Malaysia Pahang (UMP) di Gambang pada 4 Februari 2014 yang lalu.

Lawatan yang diketuai oleh Guru Kaunselor, Ahmad Khazani Abdul Wahab ini bertujuan menimba pengalaman dan mendapatkan maklumat mengenai program-program yang ditawarkan universiti ini serta untuk menyaksikan sendiri kehidupan kampus dengan lebih dekat.

Dalam lawatan ini, pelajar dibawa melawat makmal Fakulti Kejuruteraan Kimia & Sumber Asli (FKKSA) dan Fakulti Sains & Teknologi Industri (FSTI) bagi menyaksikan kecanggihan makmal yang berteknologi tinggi di sini.

Dalam masa yang sama pelajar berpeluang melawat Galeri UMP yang menyimpan koleksi sejarah UMP, penyelidikan dan inovasi serta pencapaian pelajar sejak universiti ini ditubuhkan.

Ahmad Khazani berkata, pihaknya teruja untuk hadir melawat UMP yang merupakan institut pengajian terkemuka ini malahan, penyertaan pelajar pada kali ini bukan sahaja melibatkan pelajar Aliran Sains semata-mata tetapi juga melibatkan pelajar Aliran Sastera.

“Saya beranggapan golongan pelajar ini

perlu merasai dan melihat sendiri suasana di menara gading dan sebagai mahasiswa universiti memandangkan kebanyakan mereka berasal dari kampung dan usaha ini sebagai pemangkin bagi mereka menanam azam untuk belajar bersungguh-sungguh,” katanya.

Menurut beliau, dengan pendedahan awal ini diharapkan mereka lebih berusaha keras, bersemangat, berdisiplin, serta responsif kepada perubahan subjek pembelajaran yang sentiasa memerlukan pendekatan terkini.

Sementara itu, Nur Azreen Abdullah, 17 merupakan pelajar yang cemerlang semasa Penilaian Menengah Rendah (PMR) yang memperolehi 7A 1B amat teruja dapat mengikuti lawatan sambil belajar ini.

Katanya, pendedahan seperti ini membuatkan beliau lebih mengetahui selok-belok bagaimana dan hala tuju selepas tamat persekolahan nanti. Ianya juga memberi gambaran sebenar apa yang dipelajari dan persekitaran yang amat berbeza dengan sekolah.

Nur Azreen yang bercita-cita menjadi jurutera dalam bidang automotif berkata, sasaran dan pencapaian semasa pemilihan subjek juga amat membantunya dalam menentukan masa depan pelajar yang berhasrat memegang segulung ijazah itu kelak tercapai.